



# ILIDŽA

## INFORMATIVNI BILTEN OPĆINE ILIDŽA

Ilidža • April 2018  
• Broj 170





## Delegacija Kantona Sarajevo u posjeti Općini Ilidža

**D**elegacija Kantona Sarajevo, predvođena premijerom Ademom Zoljem posjetila je 23. aprila 2018. godine Općinu Ilidža. Načelnik prof. dr. Senaid Memić upoznao ih je sa aktuelnostima koje provodi općinska administracija, a i sa problemima sa kojima se suočava.

Prema riječima načelnika Memića u ovoj godini se mora započeti sa projektima izgradnje tramvaj pruge Ilidža-Hrasnica, asfaltiranjem ceste u Velikoj aleji, izgradnjom škole na Stupu, te asfaltiranjem saobraćajnice od Zmijske stijene (malog mosta) prema mostu Alije Zetbegovića.

„Općina Ilidža je stabilna općina, naši prioriteti nisu nezamislivi i neizvodivi i očekujemo podršku Kantona“ istakao je načelnik Memić. Premijer Zolj obećao je podršku u realizaciji ovih projekata u okviru zakonskih i materijalnih okvira. U posjeti Općini Ilidža, sa premijerom Zoljem bili su ministar saobraćaja Mujo Fišo i ministar finansija Jasmin Halebić.



## Kuvajtska princeza Šejha Newal Al-Sabah u posjeti Općini Ilidža

**K**uvajtska princeza Šejha Newal Al-Sabah boravi na Ilidži. U posjeti Općini Ilidža bila je 17. aprila gdje je primio načelnik Općine Ilidža prof. dr. Senaid Memić.

Princezu iz kraljevske porodice Al-Sabah upoznao je sa potencijalima sa kojima raspolaže ova općina, posebno potencijarajući turizam, a razgovarano je i o mogućnosti saradnje iz oblasti obrazovanja, kulture i sporta.



Kuvajt ima uređenje ustavne monarhije. Na 17.870 km<sup>2</sup> površine ove zemlje živi blizu 3,7 miliona stanovnika. Od toga je preko 1,4 miliona (33%) Kuvajćana i preko 2,2 miliona (67%) stranaca. Iako je islam najzastupljenija religija u Kuvajtu, zemlja ima velike zajednice stranaca hindusa, kršćana, budista i sikha. Zemljom upravlja dinastija Al-Sabah.



## Službi zaštite i spašavanja za čistoću i asanaciju terena CZ uručena nova specijalna radna mašina hidraulična platforma

Radi efikasnijeg i boljeg rada Civilne zaštite Općine Ilidža u slučaju prirodnih i drugih nepogoda, Općina je i ove godine nastavila opremanje njenih struktura. Tako je za potrebe Službe zaštite i spašavanja za čistoću i asanaciju terena formirane u JP „Ilidža“ nabavljena nova specijalna radna mašina hidraulična platforma. Tim povodom načelnik Općine Ilidža prof. dr. Senaid Memić 27. aprila 2018. godine uručio je ovoj službi hidrauličnu platformu čija vrijednost je 134.000 KM a kupljen je iz namjenskih sredstava koja se izdvajaju za zaštitu i spašavanje. Opremanjem struktura CZ poboljšava se njena efikasnost kroz blagovremeno djelovanje u prirodnim i drugim nesrećama, kao i preventivna zaštita kroz redovan rad.



„Ovo je nastavak opremanja struktura civilne zaštite koje će se nastaviti i u narednim godinama. Dobra opremljenost službi je garant boljem i efikasnijem radu na terenu u slučaju prirodnih nepogoda i nesreća,“ kazao je načelnik Memić prilikom svečanog uručivanja mašine.

## Općina Ilidža donirala firmi PD “Butmir” traktor

Općina Ilidža donirala je KJKP “PD Butmir” traktor sa kabinom KUBATOM 5091, 4 WD. Vrijednost traktora je 93.517, 09 KM. U krugu dvorišta firme PD “Butmir” načelnik Općine Ilidža prof. dr. Senaid Memić uručio je ključeve u ruke Almiru Muzuru izvršnom direktoru za proizvodnju PD “Butmir”.

“U ime svih uposlenika PD “Butmir” zahvaljujem Općini Ilidža i načelniku Memiću na izuzetno vrijednoj donaciji. Najavljujem u ovoj godini realizaciju još jednog velikog projekta. Radi se o postrojenju za proizvodnju organskog đubriva. Projekat smo uspjeli organizovati zahvaljujući SERDI i Poljoprivrednom fakultetu. Sredstva su obezbijeđena putem IPA fondova, a realizacijom ovog projekta će se poboljšati, kako reproduktivne tako i proizvodne sposobnosti. Sa sigurnošću tvrdim da je PD Butmir u posljednje dvije godine sinergija znanja, umijeća i timskog rada i da je donacija došla u pravo vrijeme” kazao je Muzur, dodavši da u ovom preduzeću ima 600 grla krava.

“Izuzetno sam počastvovan da ovaj traktor može se predati na korištenje PD “Butmiru”. Ovo je mašina koja može zadovoljiti i unaprijediti mnogo potreba ovog preduzeća i nadamo se da je donacija došla u pravo vrijeme” rekao je načelnik Memić.



## Odgođena posjeta

### Memorijalnom centru Potočari

Jednodnevna posjeta Memorijalnom centru Potočari-Srebrenica koja je bila planirana za 26. april 2018. godine za učenike sedmih razreda ilidžanskih osnovnih škola, odgođena je. Posjeta je prolongirana za 15. maj 2018. i to zbog neodgovornosti i odustajanja autoprijevoznika Glob tour d.o.o od konkurentske prijave za prijevoz. Zbog postupka ove firme Općina Ilidža je dovedena u dodatne troškove, ali nastavlja s ovim projektom.

Već 11 godina Općina Ilidža u cilju odavanja počasti žrtvama genocida i suosjećanja sa onima koji su izgubili svoje najmilije, organizuje posjetu Memorijalnom centru Potočari. Učenici tokom posjete poslušaju historijski čas u Potočarima, koji je simbol patnje i simbol stradanja, mjesto najveće tragedije koja se dogodila na tlu Evrope nakon Drugog svjetskog rata, u kojem je ubijeno više od 8.372 Bošnjaka, mahom muškaraca i dječaka. Do sad je oko 7.000 ilidžanskih osnovaca posjetilo Potočare.



## Općina Ilidža upravljat će neolitskim parkom Butmir, Ilidža i objektom muzejskog sadržaja



U Općini Ilidža 13. aprila održana je prezentacija "Plan preventivne prospekcije arheološkog potencijala na lokalitetu nacionalnog spomenika arheološkog područja prahistorijskog naselja Butmira (faza I i II) kao i izmjena i dopuna Odluke o proglašenju arheološkog područja prahistorijskog naselja u Butmiru.

Prezentacija je održana u organizaciji Komisije za očuvanje nacionalnih spomenika BiH.

Kako je rečeno na prezentaciji, na lokalitetu Butmir između Doma zdravlja na zapadu i naselja Butmir na istoku, ustanovljeni su na lokaciji Tilave ostaci mezolitskog i proteolitskog perioda, datirani okvirno u period od 8000. do 6000. godine prije naše ere. Na lokaciji Poljoprivredne stanice uz rubni dio centralnog dijela nalazišta otkriveni su ostaci faze Butmir I, Butmir II i Butmir III, na lokaciji Poljoprivredne stanice u centralnom dijelu naselja otkrivenom do 1896 poznati su ostaci faze Butmir II.

Najveći i najpoznatiji broj nalaza sa lokaliteta Butmir pripada periodu mlađeg neolita zajedno sa nalazima sa lokaliteta Obre II kod Čatića u dolini Trstionice, Brda u Kiseljaku, Neba i Mujevine u dolini Bile kod Travnika Crkvine u Turbetu, Okolišta kod Moštra i Kraljevina kod Novog Šehera. U njima je bila ista neolitska kultura koja je nazvana butmirskom kulturnom skupinom.

Komisija je utvrdila na navedenom prostoru sljedeće mjere zaštite: dopušteni su isključivo istraživački i konzervatorsko-restauratorski radovi, uključujući i one koji imaju za cilj prezentaciju spomenika, uz odobrenje ministarstva nadležnog za prostorno uređenje u Federaciji Bosne i Hercegovine i stručni nadzor nadležne službe zaštite naslijeđa na nivou Federacije Bosne i Hercegovine, ukloniti sve postojeće objekte sa prostora nacionalnog spomenika, posebno objekat firme Ansdrive d.o.o., koji se nalazi na centralnom dijelu lokaliteta, u periodu od godinu dana izraditi detaljan Plan Neolitskog parka Butmir Ilidža, koji treba sadržavati i objekat muzejskog sadržaja u kojem će biti pohranjeni i prezentirani arheološki nalazi sa ovog lokaliteta.

Planom Neolitskog parka Butmir, će se definisati obuhvat arheoloških iskopavanja po fazama, izgradnja parka i uvrštavanja ovog lokaliteta u kulturnu i turističku rutu Bosne i Hercegovine, radovi ove vrste ne smiju trajati duže od dvije godine.

Upravljanje neolitskim parkom Butmir, Ilidža i objektom muzejskog sadržaja vršit će Općina Ilidža, a finansiranje arheoloških iskopavanja i izgradnja parka stavlja se u obavezu firmi Hotel Hills d.o.o. Ilidža.

Područje predstavlja arheološki lokalitet, pa je prilikom obavljanja arheoloških istražnih radova obavezno osigurati prisustvo arheologa, zabranjeno je izvođenje građevinskih radova i promjena oblika terena, te izgradnja infrastrukture, industrijskih objekata i postrojenja, a prostor spomenika bit će otvoren i dostupan javnosti, a može se koristiti u

edukativne i kulturne svrhe, a zabranjeno je odlaganje svih vrsta otpada, mjere su koje je predložila Komisija za očuvanje nacionalnih spomenika BiH.

Komisija na definiranom prostoru utvrđuje još da nije dozvoljena eksploatacija kamena, lociranje potencijalnih zagađivača okoline utvrđenih propisima, izgradnja industrijskih objekata i magistralne infrastrukture i svih objekata koji u toku izgradnje ili u toku eksploatacije mogu da ugroze nacionalni spomenik.

Nije dopušteno izvođenje radova koji bi mogli utjecati na izmjenu područja i promjenu krajolika, a dopušteno je obavljanje radova na infrastrukturi uz prethodno pribavljeno odobrenje od strane nadležnog ministarstva i stručnog mišljenja nadležne službe zaštite.

Na prostoru s desne obale Tilave dopuštena je gradnja objekata muzejskog sadržaja namijenjenog za prezentaciju lokaliteta i arheoloških nalaza, na prostoru s lijeve strane obale rijeke Tilave dopuštena je gradnja objekata koji su sastavni dio Regulacionog plana „Nova Ilidža 1, 2 i 3“ s napomenom da njihova spratnost ne smije prelaziti visinu od 4 sprata, odnosno prizemlje + četiri sprata (P + 4).

Na prostoru oko Poljoprivrednog instituta, postojeći objekti se ne mogu dograđivati, tj, ostaju u sadašnjim gabaritima.





# Javni poziv za finansiranje i sufinansiranje najboljih poslovnih planova sredstvima Budžeta Općine Ilidža



Općina Ilidža raspisala je javni poziv za finansiranje i sufinansiranje najboljih poslovnih planova sredstvima Budžeta Općine Ilidža namijenjenih razvoju poduzetničke inicijative mladih sa područja općine Ilidža i poziva mlade nezaposlene osobe da se, ukoliko imaju poslovnu ideju, prijave na konkurs za finansiranje i sufinansiranje najboljih poslovnih planova iz Budžeta Općine Ilidža.

Poticajem poslovne ideje pruža se prilika da samozapošljavanjem doprinesu razvoju svoje lokalne zajednice. Planirana Budžetska sredstva u 2018. godinu za ovaj projekat iznose 50.000,00 KM.

Na osnovu javnog poziva odabrat će se najbolji poslovni planovi mladih i novčano nagraditi. Novčana nagrada namijenjena je sufinansiranju troškova pokretanja biznisa kroz finansiranje troškova registracije biznisa, troškova sredstava za rad, zakupa poslovnih prostorija, obrtnih sredstava i ostalih troškova. Visina nepovratnih sredstava po poslovnom planu može iznositi maksimalno do 5.000,00 KM.

Korisnici sredstava mogu biti osobe koje se nalaze se u evidenciji nezaposlenih JU Službe za zapošljavanje Kantona Sarajevo - Biro Ilidža (dužina trajanja nezaposlenosti najmanje četiri mjeseca u kontinuitetu do dana objave Javnog poziva), imaju prebivalište na području općine Ilidža i imaju do 35 godina. Poslovnu ideju će registrovati i razvijati vlastiti biznis na području općine Ilidža.

Postupak dodjele nepovratnih sredstava Općine Ilidža namijenjenih poticaju zapošljavanja mladih kroz osnivanje biznisa provodi Komisija koju imenuje Općinski načelnik.

Komisija utvrđuje prijedlog Odluke o dodjeli budžetskih sredstava sa iznosom novčane podrške i istu dostavlja Općinskom načelniku na odobravanje. Prijava mora biti potpuna i uz nju mora biti dostavljena sva dokumentacija tražena Javnim pozivom.

Prijava treba sadržavati poslovni plan, ovjerenu fotokopiju lične karte, original ili ovjerena fotokopija CIPS-ove prijave prebivališta ne starije od 30 dana, potvrda JU Službe za zapošljavanje Kantona Sarajevo – Biro Ilidža da se nalazi u evidenciji nezaposlenih sa naznačenim periodom dužine trajanja nezaposlenosti, te ovjerenu Izjavu da će dodijeljena

sredstva iskoristiti za nabavku potrebnih sredstava za rad navedenih u poslovnom planu, registrovati i održavati vlastiti biznis. Obrasci Poslovnog plana, Izjave i prijave na Javni poziv mogu se preuzeti na web stranici Općine Ilidža (<http://www.opcinailidza.ba/news/default/javni-poziv-za-finansiranje-i-sufinansiranje-najboljih-poslovnih-planova-sredstvima-budzeta-opcine-ilidza-namijenjenih-razvoju-poduzetničke-inicijative-mladih-sa-područja-opcine-ilidza>), Centru za pružanje usluga građanima Općine Ilidža i u Službi za privredu i turizam / soba broj 323.

Javni poziv će trajati do 10. juna 2018. godine.

## Uskoro adresni registar

U Općini Ilidža 23. aprila 2018. godine održan je sastanak Radne grupe o uspostavi i održavanju podataka adresnog registra na području ove općine. Na sastanku je prezentiran urađeni posao u dva mjeseca, u kojem je obilježeno 297 ulica na području općine Ilidža. U sljedećoj fazi, kako je dogovoreno, izvršit će se uvid stanja na terenu i tačnost podataka sa kojima raspolaže Radna grupa. Ovim registrom Općina Ilidža će dobiti kvalitetni ažurni registar koji će biti uvezan sa sistemom katastar.ba, gdje će biti adrese sa kućnim brojevima. Sekretari MZ će u narednom periodu ažurirati podatke sa terena u ovaj registar.





## Obilježena 26. godišnjica DIO Fikro

Historija je 1992. godine počela da piše nova prijateljstva koja su vezana neraskidivim vezama. Zakletve koje su tad izgovorene ostaju vječno da svjedoče nekim novim generacijama da su postojali u podnožju planine Igman, i da se nisu libili dati svoje živote za ovaj komad zemlje i slobodu naroda koji su živjeli i danas žive ovdje. Svakom akcijom, svakim sijelom, svakim smijehom i svakom suzom postajali su jedno. Uvijek su bili svi za jednog, jedan za sve. To su pripadnici Diverzantsko izviđačkog odreda "Fikro".

U Hrasnici 9. aprila ispred Doma kulture obilježena je 26. godišnjica Diverzantsko izviđačkog odreda "Fikro". Jedinicu, koja je osnovana 1992. godine na osnovu naredbe predsjednika Republike BiH, formirao je Fikret Prevljak.

General Fikro kojeg svi tako i zovu, tu je i u miru za svoje vojnike. Znao je gdje mu je koji vojnik, u svakoj ofanzivi je bio s njima, svaku borbu je nosio na svojim leđima.

Danas, 26. godina poslije general opet poziva svoje sugrađane, saborce, ali ovaj put na jedinstvo i slogu.

"Ja ne bi bio ono što sam da nije bilo vas. Uspjehe u bitkama smo ispisivali krvlju i svojim životima. Naši pripadnici moraju imati ugled na zasluženom nivou i to ne samo oni već svi oni koji su dali doprinos u odbrani BiH. Pomozimo sada svi nekim našim pripadnicima koji u u lošoj materijalnoj situaciji, ali nikad ne zaboravite naše porodice poginulih molim vas s ovog mjesta" poručio je Prevljak.

Načelnik Općine Ilidža prof. dr. Senaid Memić rekao je da zasluge koje imaju pripadnici ove jedinice, kao i poginuli šehidi nikad ne smiju biti zaboravljeni.

"Mi danas moramo puno raditi i graditi našu državu, jedino radom ćemo joj pomoći. Moja vrata su uvijek za vas otvorena" dodao je Memić.

Potom su brojne delegacije položile cvijeće na stećak DIO Fikro, spomen obilježja ispred Doma kulture i mezarja Emira Bogunića Čarlija i Ejuba Sarajkića. Dodijeljena su priznanja najstarijim članovima udruženja: Našidu Beširagiću, Bajri Džafi, Sulji Zorlaku, Ibrici Džini, Ramizu Ploči i postuhmno Arneli Šarić. Na mezarju Kovači Hrasnica proučen je Jasin i položeno cvijeće šehidima i poginulim borcima.

## Obilježena godišnjica oslobođenja Sarajeva

U organizaciji Udruženja antifašista i boraca narodnooslobodilačkog rata Ilidža polaganjem cvijeća u Velikom parku na Ilidži obilježen je 6. april, 73. godišnjica oslobođenja grada Sarajeva. Šesti april najznačajniji je datum u historiji Sarajeva. To je dan kada je Sarajevo oslobođeno od fašističke okupacije tokom Drugog svjetskog rata, ali i dan koji simbolizuje početak opsade Sarajeva u proteklom ratu u BiH. Zbog toga se 6. april obilježava kao dan oslobođenja grada u Drugom svjetskom ratu i kao Dan grada.

"Mi smo se danas 6. aprila okupili ovdje pored spomen košturnice na čijim pločama je uklesano 99 imena, poginulih boraca u NOB-a da im odamo počast. Borba protiv fašizma traje i danas" rekao nam je Nikola Babić, predsjednik Upravnog odbora UABNOR-a Ilidža.



## Obilježen Dan odbranjene Ilidže

U organizaciji Patriotske lige Ilidža, Udruženja 4. Viteške motorizovane brigade i Općine Ilidža, 22. aprila 2018. godine ispred Pete osnovne škole u Sokolović- Koloniji održan je tradicionalni Memorijalno-historijski susret pod nazivom „Dani odbrane Ilidže“.

U prisustvu velikog broja građana, delegacije Općine Ilidža, udruženja boraca, političkih stranaka, rodbine i prijatelja položile su cvijeće ispred spomen-obilježja i učenjem Fatihe, minutom šutnje odali počast šehidima, poginulim borcima i civilnim žrtvama rata.

Ministar za boračka pitanja Kantona Sarajevo Muharem Fišo u svom obraćanju prisutnim istakao je da imamo dug i obavezu prema poginulim da ih nikad ne zaboravimo i da nisu uzalud dali svoje živote kako bi mi danas živjeli slobodni. Ovo mjesto i ovaj datum su najznačajniji u odbrani ne samo Ilidže već i cijele Bosne i Hercegovine, to je dan kada je agresor doživio prvi poraz.

Komandant Odreda "22. april" i učesnik ove sudbonosne bitke Mirsad Mirojević kazao je da su se borci hrabro suprostavili tadašnjoj četvrtj vojnoj sili u Evropi izdajničkoj JNA, te da je ovo najznačajniji dan u istoriji Ilidže, dan kada je narod odlučio da se bori za Bosnu i Hercegovinu i dan kada je pokazao da će opstati i da je lijepo što postoje ovakve manifestacije na kojima se borci sretnu i prisjete ratnih dana.

U okviru obilježavanja ovog značajnog datuma položeno je cvijeće na Centralno spomen-obilježje ispred zgrade Općine Ilidža i ispred Ratne bolnice „Camil Marić“ u Hrasnici. Uprilježena je i memorijalna šetnja u kojoj su učestvovali učenici osnovnih škola sa područja Ilidže, a išli su ratnim putem od Instituta do Pete osnovne škole. Održan je i turnir u malom nogometu osnovnih škola sa područja Ilidže, te izložba ratnih fotografija, takmičenje u prvoj pomoći, ekološka akcija čišćenja naselja i smotra folkloru. Prigodan program izveli su učenici Pete i Devete osnovne škole, obilježivši i Dan mjesne zajednice Sokolović- Kolonije, te godišnjicu Odreda „22. april“ i formiranje Ratne bolnice „Camil Marić“.





## Susret heroina Općine Ilidža 1992-1995

**A**prila 1992. godine u Hrasnici grupa hrabrih ljudi počinje da formira ratnu Općinu Ilidža. U želji da se doprinese da naša domovina BiH ne nestane, počinje sa radom jedinica lokalne samouprave Općina Ilidža, BiH.

I u ratu sve je funkcionisalo kao da se ne puca, kao da se ne gine, kao da je sasvim normalno radno vrijeme. Samo što se za taj rad ne plaća novcem, već životom. Svaki dolazak na posao mogao je da bude i zadnji. Dolazilo se dobrovoljno svaki dan pješice, a neko biciklom, iz Sokolović-Kolonije, Butmira i Hrasnice. I sve je radilo, od ovjere, urbanizma, privrede, evidencije, matičnog ureda, počinju nova prijateljstva, nove neraskidive veze.

I nakon 26 godina, kada se nekih događaja mnogi ne žele ni da sjećaju i žele da izbrišu ružno iz memorije, kod Sibine Rožajac i Alme Bašalije rađa se ideja da se okupe, sastanu i vide gdje su sad.

Za početak ideja je bila da se okupe žene-heroine koje su kroz radni angažman u Općini Ilidža dale doprinos u odbrani BiH. I došle su njih 40, 21. aprila 2018. u restoran Cordoba. To više nisu djevojčice, djevojke. To su sad žene majke, bake, ali i dalje su ostale heroine. Kao i onda 1992. i danas bi im na izgledu i energiji pozavidjele mnoge žene iz zapadnih zemalja.

Druženje uz kafu je proteklo uz suze, smijeh, evociranje uspomena.



Ove žene zaslužuju poštovanje, one su kad je najteže bilo davale sebe za državu BiH i ostat će da svjedoče uvijek da šalju poruku nekim novim generacija da se nikad ne zaboravi i ne ponovi ono što su one preživjele. Ono što su preživjele čuvaju kao uspomenu, a njihov susret neće biti zadnji, jer u najtežim trenucima one se nisu libile, a ne libe se ničega ni dan danas. To su časne, vrijedne i poštovane službenice Općine Ilidža i samo takav odnos i zaslužuju.

## Svečani prijem za borce - nekadašnje pripadnike Armije BiH

**N**ačelnik Općine Ilidža prof. dr. Senaid Memić i predsjedavajući Općinskog vijeća Muhamed Omerović 16. aprila u Izvoru Bosne organizirali su prijem za borce, nekadašnje pripadnike Armije BiH i MUP-a sa područja općine Ilidža.

„Vi ste naš odgovor i naša poruka prijateljima i neprijateljima da nema pogodbe kada se radi o opstanku naroda i zemlje!“, poruka je ovog skupa.

Na prijemu su se obratili general Fikret Prevljak, proslavljeni komandant Četvrtе muslimanske slavne brigade Nezim Halilović Muderis i načelnik Općine Ilidža prof. dr. Senaid Memić.

Zajednički su ocijenili da za BiH i dalje traje borba, baš kao i zajedništvom sa onima koji su najviše dali za ovu državu, treba nastaviti izgradnju države, podcrtavši da je jedinstvo u ovom momentu za Bosnu i Hercegovinu najvažnije.



## Obilježena godišnjica pogibije Hajrudina Klepe

**U**organizaciji Općine Ilidža i Udruženja organizatora otpora veterana rata, dobrovoljaca, prvoboraca i branilaca „Zelene beretke“, 5. aprila 2018. godine u prisustvu rodbine, prijatelja, saboraca, predstavnika boračkih udruženja i Općine, obilježena je 26. godišnjica pogibije šehida Hajrudina Klepe. Članovi porodice Hajrudina Klepe, delegacije Općine, Zelenih beretki i Četvrtе viteške brigade položili su cvijeće na mezar i kod mjesto pogibije na spomen obilježje i proučili Fatihu i odali počast ovom šehidu.

Rahmetli Hajrudin se među prvima priključio Zelenim beretkama i aktivno se uključio u akciju izuzimanja oružja i MTS-a iz baze u Krtelju. Prilikom jednog od mnogobrojnih ulazaka u bazu u pokušaju da osposobi transporter, hrabro je poginuo od snajperskog hica.

Prigodan program izveli su učenici Osme osnovne škole „Amer Čenanović“ i izviđači „Zelenih beretki“ Vogošće.





## Obilježeno prvo postrojavanje jedinica na Stupskom brdu

U čenjem Fatihe, minutom šutnje i polaganjem cvijeća na spomen obilježje šehidima i poginulim borcima, 4. aprila 2018. godine obilježeno je prvo postrojavanje jedinica na Stupskom brdu-Prve samostalne brigade Stup i Dan mjesne zajednice Stupsko brdo. Cvijeće su položile delegacije Općine Ilidža, Udruženja Prva samostalna brigada, Četvrte viteške brigade i mjesne zajednice Stupsko brdo. O značaju ovih događaja prisutnim su govorili Sulejman Đehović, komandant TO na ovim prostorima i prvi komandant brigade Ševal Bećiragić koji su istakli da je ovo bila prva brigada u Sarajevu, te da su se sami organizovali i odbranili od agresora. U okviru obilježavanja ovog značajnog datuma održana je svečana sjednica Savjeta mjesne zajednice Stupsko brdo, a organizovan je i turnir u stonom tenisu za mlađe kategorije. Organizator ove manifestacije je Udruženje boraca Prva samostalna brigada Stup i Općina Ilidža.



## Pripreme za Festival narodne muzike "Ilidža 2018"

Općina Ilidža će i ove godine organizovati i realizovati kulturno-muzičku manifestaciju pod nazivom Festival narodne muzike "Ilidža 2018". Pripreme za ovaj događaj teku uveliko. Tim povodom u Općini Ilidža 2. aprila 2018. godine održan je sastanak na kojem je imenovan Organizacioni odbor za održavanje Festivala. U Organizacioni odbor imenovani su: Elvir Švrakić, predsjednik, a članovi su: prof. dr. Senaid Memić, načelnik Općine Ilidža, Muhamed Omerović, Velida Memić, Denis Muhović, Amra Bojičić, Edina Ičindić, Dženeta Hamidović Mrndić, Jadran Ibrulj, Lejla Pokrkljić i Amela Gadžo. Na mjestu članova komisije za selekciju kompozicija Festivala "Ilidža 2018" imenovani su: Amela Gadžo, Emir Merjemić, Fahrudin Pecikoza, Hanka Paldum i Nedžad Imamović. Umjetnički direktor Festivala "Ilidža 2018" je Alma Švrakić, a na mjesto izvršnog direktora Festivala "Ilidža 2018" imenovan je Damir Klopčić.

Festival će se održati od 18. do 21. jula 2018. godine.

## Obuka za kvalitetnije pružanje usluga

U Općini Ilidža od 23. do 25. aprila održana je obuka i predavanje prema EN ISO 19011:2015. U obuku su bili uključeni zaposleni koji su imali edukaciju oko stalnog poboljšanja u procesima rada općinskog organa u cilju povećanja zadovoljstva relevantnih zainteresiranih strana, racionalnoj potrošnji resursa, smanjenju troškova rada i kvalitetnom upravljanju okolinjskim aspektima, a sve u interesu pružanja što kvalitetnijih usluga građanima. Zaposleni su nakon pismenog ispita dobili certifikate renomirane evropske certifikacione kuće TÜV Thüringen.







## “Ekološka dječija radionica”

**E**kološko udruženje “Aleja” 15. aprila realizovalo je projekt “Ekološka dječija radionica”. Učesnici projekta bila su djeca osnovnoškolskog i predškolskog uzrasta gdje su iskoristili plastične čepove, pravili predmete koje mogu svakodnevno koristiti u svojim domovima. U radionici su prikazana i dva kratkometražna filma o ozonu, gdje su učesnici pokazali svoje znanje, koje će prenositi na svoje prijatelje i na taj način dati svoj doprinos u zaštiti i očuvanju okoliša.



## Tehničari Druge osnovne škole osvojili prvo mjesto

**D**omaćin 19. Smotre naučno-tehničkog stvaralašta mladih Ilidže, koje je održano 21. aprila 2018. godine bila je Prva osnovna škola. Na takmičenju su učestvovali učenici iz devet osnovnih škola sa područja općine Ilidža. Svaku školu predstavljalo je po pet učenika od petog do devetog razreda. Prvo mjesto osvojili su tehničari Druge osnovne škole koju su predstavljali Umihana Muslić, Nejra Salihović, Naida Ibričić, Adna Pamuk i Azra Pamuk. Drugo mjesto pripalo je ekipi Devete osnovne škole za koju su se takmičili Ajsela Spahić, Ena Dorić, Ena Musa, Berina Karić i Nejra Sinanović, dok je trećeplasirana Četvrta osnovna škola i njeni učenici Adina Hebibović, Muhamed Džihić, Adem Džihić, Sumeja Durmo i Adil Tutun. Pobjednicima su uručeni pehari i diplome koji će općinu Ilidža predstavljati na kantonalnom takmičenju.

## Izdato 105 odobrenja za registraciju i obavljanje samostalne djelatnosti

**N**a osnovu informacije Službe za privredu i turizam za prva tri mjeseca ove godine na području općine Ilidža izdato je 105 rješenja kojima se odobrava registracija samostalnih radnji i obavljanje samostalne djelatnosti od toga 44 iz oblasti trgovine, 12 ugostiteljstva, 43 obrta i obrtu srodnih djelatnosti i 6 prevoza. Najveći broj registrovanih radnji/djelatnosti je iz oblasti trgovine, a razlog tome je Zakon o izmjenama i dopunama Zakona o unutrašnjoj trgovini kojim je proširena definicija trgovac po kojoj je to fizičko lice koje obavlja djelatnost trgovine isključivo ličnim radom izvan prodavnice „trgovac-pojedinac“, a sve u cilju sprečavanja nelegalnog rada na pijacama. Ovome je doprin-

jela i odredba zakona da tržnice i pijace ne mogu zaključivati ugovore o iznajmljivanju tezgi sa licima koja nemaju registrovanu djelatnost „trgovac-pojedinac“.





## Elif u Prvoj osnovnoj školi

**D**ječiji festival, koji se 26. aprila, u organizaciji Instituta "Yunus Emre", bogatim programom upriličio u Zenici, okupio je više od 6.000 djece iz cijele Bosne i Hercegovine. Radi se o učenicima koji su naučili turski jezik u okviru projekta "Moj izbor je turski". Djevojčica Isabella Damla Guvenilir, glavna glumica u seriji "Elif", koja je bila na festivalu i prošle godine došla je i ove godine u BiH.

Posjetila je i Prvu osnovnu školu na Ilidži, u kojoj su je dočekali direktor Arif Čelović, nastavno osoblje i više stotina učenika, koji su iskoristili ovu priliku da se fotografiraju sa omiljenom glumicom.

## Prijem za delegaciju škole Husein Avni Sozen Anadolu Lisesi-Uskudar

**D**elegacija istanbulske škole Husein Avni Sozen Anadolu Lisesi-Uskudar u posjeti je Četvrtoj gimnaziji, bratskoj školi. Četvrta gimnazija već nekoliko godina realizuje projekt pod nazivom "Učimo se toleranciji" koji podrazumijeva da ova škola realizuje projekt saradnje i razmjene kulture, kulturnog naslijeđa i razvoj tolerancije među učenicima i profesorima ove dvije škole.

Putem ovog projekta afirmišu i lokalnu zajednicu i prirodne ljepote Općine Ilidža ali i Istanbula.

Tim povodom za ovu delegaciju prijem je organizirao i načelnik Općine Ilidža prof. dr. Senaid Memić koji im je poželio dobrodošlicu, a i predstavio ljepote Općine Ilidža.



## Obilježen Dan Četvrte gimnazije

**U**čenicima Četvrte gimnazije Ilidža 11. aprila imali su razlog za slavlje. U njihovoj školi obilježeno je 57. godina postojanja, Dan škole. Srednjoškolci su pripremili prigodnu priredbu te pjesmom, izvrsnim izvođenjem

muzičkih numera na engleskom, turskom, francuskom uljepšali su svoj dan. U Četvrtoj gimnaziji je bilo pjesme, smijeha, plesa i graje.

Ovu školu pohađa sada 383 učenika.



## Prijem za zlatne momke Edina Sinanovića i Sadina Hadžajliju

**N**a Evropskom kupu u kik boksu održanom u Beogradu 16.-18. marta 2018. godine na kojem je nastupilo 330 takmičara iz 12 zemalja, takmičari Kick boxing akademije Ilidža osvojili su dvije zlatne medalje.

Edin Sinanović u seniorskoj konkurenciji u kategoriji 67kg i Sadin Hadžajlija u juniorskoj konkurenciji u kategoriji 91kg. Tim povodom načelnik Općine Ilidža prof. dr. Senaid Memić 6. aprila upriličio je prijem za njih i uputio čestitke ovim sportistima.

“Čast mi je što ste vi naši sugrađani i što svojim nastupima i svojim zapaženim rezultatima predstavljate općinu Ilidža, a uspjesima koji postizete, vi niste samo ambasadori Ilidže, već cijele BiH.“ izjavio je, između ostalog, načelnik Memić, te dodao da je podrška ovom klubu u skladu sa budžetskim sredstvima, neupitna.

Zlatni momci potom su uručili načelniku Memiću zahvalnicu za sav njegov nesebičan doprinos u radu Kluba.

## Četrnaesto kolo Minibasket lige Kantona Sarajevo

**Č**etrnaesto kolo Minibasket lige Kantona Sarajevo u košarci odigrano je 8. aprila 2018., kao i trening utakmice sa Međunarodnom školom QSI, trening utakmice škola košarke Košarkaškog kluba Ilidža i utakmica kadetske selekcije ovog kluba.

Domaćin utakmica je bila je Deveta osnovna škola u Rakovici.

Sve je počelo u 08.00 sati, a završilo u 20.00 sati. Dvanaest sati igre, lijepih poteza, zabave, osmjeha a prije svega druženja mladih sa područja općine Ilidža, Kantona

Sarajevo, Evrope i svijeta. Bilo je tu mladih košarkaša iz Norveške, Njemačke, Engleske, Švedske, Hrvatske, Kine, Japana, SAD-a itd. Bili su tu roditelji i prijatelji mladih košarkaša i košarkašica, mnogobrojni ambasadori i predstavnici zemalja u BiH i svi su ovaj dan bili „ambasadori djece i košarke“. Treneri su birali najtalentovanije košarkaše i košarkašice, tako da su se i ovom prilikom proglasili najtalentovaniji igrači kola.

Najtalentovnije igrači kola: Farik Junuzović (OKK „Spars“), Vedad Šabović (KK“BBY“), Adnan Šehović (KK“Bošnjak“), Rijad Mujić (KK “Real Way II“), Nihad Bošnjak (KK“ Ilidža“), i Tin Dorić (KK“ Ilidža“), Mirnes Osmanović (KK“ Vogošća“), Bakir Đedović (KK“Real Way I), Ajdin Delić (KK „Ilidža“), Timothy Banks (KK „QSI“, Najla Hodžić (KK“BBY“), Lily Lyu (KK“QSI), Amina Patković (KK“Ilidža), Ena Mušović (KK BBY).

## Rukometašice Hrasnice prvaci

**D**va kola prije kraja takmičenja u Prvoj ligi Federacije Bosne i Hercegovine Ženski rukometni klub „Hrasnica“ osvojio je prvenstvo. Osvajanjem prvog mjesta „Vučice ispod Igmana“ kako ih od milja zovu navijači, mlade igračice „Hrasnice“ predvođena „starim vukom“, trenerom Fuadom Lokvančićem izborile su plasman u najelitnije takmičenje za rukometašice, Premijer ligu Bosne i Hercegovine. Ako se uzme u obzir da je ekipa sastavljena od djevojaka koje su ponikle u ovom klubu i da najstarije igračice imaju tek 18 godina, postignuti rezultat ima još veći značaj. Poslije slavlja slijedi kratka

pauza i ekipa će nastaviti sa treninzima punim intezitetom kako bi što spremnije dočekali početak takmičenje u Premijer ligi BiH. Titulu prvaka izborile su Almedina Mehović, Šejla Čardaklija, Merima Karišik, Amina Bečirević, Elma Mehović, Marija Šehovac, Milana Močević, Ena Hasibović, Ema Hasibović, Adna Šurković, Hena Pamuk, Samra Ramić, Samira Mulić, Melisa Omerović i Melina Telarević sa treneima Fuadom Lokvančićem i pomoćnicima Davorom Ljiljanićem i Dubravkom Božićem, te fizioterapeutima Amerom Nezirovićem i Samirom Šahmanijom.

